

# EFESIOS

---

**1** Pablojon, apóstolon i cha'an Jesucristo cha'an che' yom Dios. Mi caq'ueñetla cortesía i cha'añet ba la Dios ya' ti Efeso mu' ba la' ñop Cristo Jesús. <sup>2</sup>La' aq'uentiquetla i yutslel yic'ot i ñach'tilel la' pusic'al ch'oyol ba ti Dios lac Tat yic'ot ti lac Yum Jesucristo.

## An lac wenlel ti Cristo

<sup>3</sup>La' subjic i ñuclel Dios, i Tat lac Yum Jesucristo tsa' ba i yaq'ueyonla ti lac majtan ya' ti panchan pejtél chuqui uts'at ti Cristo. <sup>4</sup>Come tsi' yajcayonla ti Cristo che' maxto melbilic pañimil cha'an mi la cajñel ti ch'ujul ti' tojlel, saq'uesablonixla ti pejtelel lac mul. <sup>5</sup>Come tsi' wan ña'ta i yotsañonla ti' yalobil ti' wenta Jesucristo cha'an c'ux tsi' yubiyonla. Che'lach tsi' mele come che'lach yom i pusic'al. <sup>6</sup>La' lac sub i ñuclel Dios cha'an i yutslel i pusic'al tsa' ba i yaq'ueyonla ti lac majtan ti' tojlel c'uxbibil ba i Yalobil. <sup>7</sup>Che' ba tsa' ch'am i Cristo, tsi' yac'ayonla ti coel cha'an ti' ch'ich'el. Tsi' ñusabeyonla lac mul come wen on i yutslel. <sup>8</sup>Mach p'isbilic tsi' yaq'ueyonla i yutslel che' ba tsi' ts'actesa chuqui wan

ña'tabil i cha'an ti cabal i ña'tabal.

<sup>9</sup>Tsi' mele ti pejtelel che' bajche' yom i pusic'al. Tsi' tsictesabeyonla chuqui wan ña'tabil i cha'an mach ba tsictiyemic ti yamba ora tsa' ba i bajñel ña'ta i yujtesan ti Cristo.

<sup>10</sup>Mi caj i yaq'ueñob i yuman Cristo pejtél chuqui an ti panchan yic'ot ti pañimil che' tilemix i yorajlel.

<sup>11</sup>Tsi' yajcayonla ti Cristo che' bajche' tsi' wan ña'ta i mel, come Dios mi' lu' mel che' bajche' yom i pusic'al. <sup>12</sup>Yom mi lac tsictesan i ñuclel, joñonla tsa' ba lac ñaxan taja lac pijtaya ti Cristo. <sup>13</sup>Jatetla ja'el che' ba tsa' la' wubi jini wen t'an, jini isujm ba, cha'an mi la' coltantel, tsa' la' ñopo Cristo. Tsa' otsabentiyetla jini Ch'ujul ba Espíritu, jiñach la' sellojlel yilal tsa' ba tili che' bajche' wan albil.

<sup>14</sup>Aq'uebilonla jini Espíritu cha'an mi lac ña'tan ts'acal mi caj lac ch'am ti pejtelel chuqui wan albil i cha'an Dios. Mi caj i yac' ti libre i cha'año' ba cha'an mi lac tsictesan i ñuclel Dios.

## Oración cha'an mi' yaq'uentelob cabal i pusic'al

<sup>15</sup>Tsa cubi tsa'ix la' ñopo lac Yum Jesús. C'ux mi la' wubin pejtelel

i cha'año' bΛ Dios. <sup>16</sup>Jini cha'an ma'anic mij cay c suben Dios wocolix i yΛΛ cha'añetla che' mic tajetla ti oración. <sup>17</sup>Mij c'ajtiben i Dios lac Yum Jesucristo cha'an mi' yΛq'ueñetla cabal la' ña'tabal yic'ot i yEspíritu cha'an mi la' wen ch'amben isujm chuqui woli la' pasbentel, cha'an mi la' wen can lac Tat am bΛ ti panchan. <sup>18</sup>La' i yΛq'ueñet la' ch'amben isujm chuqui woli la' pijtan, come jini cha'an tsi' pΛyΛyetla cha'an mi la' can jini uts'at tac bΛ mu' bΛ caj i yΛq'uen i cha'año' bΛ. <sup>19</sup>Come mach p'isibilic jini ñuc bΛ i p'atalel Dios woli bΛ ti e'tel ti lac pusic'al mu' bΛ lac ñop. Tsi' c'añā ti lac tojlel jini jach bΛ i p'atalel <sup>20</sup>tsa' bΛ i c'añā i tech ch'ojoyel Cristo ba'an chameño' bΛ, che' bΛ tsi' buchchoco ti' ñoj ya' ti panchan. <sup>21</sup>Ñumen ñuc Cristo bajche' pejtel i yumantel tac pañimil yic'ot ñuco' bΛ i ye'tel año' bΛ i p'atalel yic'ot i yumantel. Ñumen ñuc i ye'tel bajche' pejtelel wa'chocobilo' bΛ, mach cojic jach ti ili ora pero ti tal to bΛ ora ja'el. <sup>22</sup>Dios tsi' yotsabe ti' wenta Cristo pejtel chuqui tac an. Tsi' yotsa Cristo ti' yum pejtelel xñopt'añob cha'an mi lac jac'ben ti pejtelel chuqui yom. <sup>23</sup>I bΛc'talonla Cristo. Mi' yajñel ti joñonla mu' bΛ lac ñop. Mi' ts'actiyel i tijicñayel ti joñonla. Pejtel chuqui an mi' taj i c'ajñibal ti lac Yum.

### Cuxulonixla ti Cristo

**2** Dios tsi' yΛq'ueyetla la' cuxtalel che' chameñetla ti la' jontolil yic'ot ti la' mul. <sup>2</sup>Ti yambΛ ora tsa' ajnietla ti jontolil

che' bajche' i tile i cha'año' bΛ pañimil. Tsa' la' jac'be Satanás i yum pañimil mu' bΛ i yumañoob xibajob, jini espíritu woli bΛ ti e'tel ti' pusic'al xñusa mandarob. <sup>3</sup>Ti yambΛ ora lajal tsa' ajnionla che' bajche' año' bΛ. Tsa' lac ch'ale bajche' yom lac tsucul pusic'al yic'ot lac bΛc'tal yic'ot lac tsucul ña'tabal. Tsa' lac techbe i mich'ajel Dios lajal bajche' año' bΛ. <sup>4</sup>Pero cabal tsi' p'untayonla Dios, cabal tsi' c'uxbiyonla. <sup>5</sup>Tsi' tem aq'ueyonla laj cuxtalel la quic'ot Cristo che' chameño'la ti mulil. ColtΛbiletla ti' yutslel i pusic'al Dios. <sup>6</sup>Tsi' techeyonla ch'ojoyel temel la quic'ot Cristo. Tsi' buchchocoyonla ti panchan la quic'ot Cristo Jesús <sup>7</sup>cha'an mi' pas ti pejtelel ora bajche' tsi' p'untayonla ti on bΛ i yutslel i pusic'al, che' bΛ tsi' pasbeyonla i c'uxbiya ti Cristo Jesús. <sup>8</sup>Come coltΛbiletla ti' yutslel i pusic'al Dios cha'an tsa' la' ñopo. Ma'anic tsa' la' bajñel colta la' bΛ. La' majtan jach tilem bΛ ti Dios. <sup>9</sup>Mach cha'anic wen bΛ la' melbal, ame anic majqui mi' lon chañ'esan i bΛ. <sup>10</sup>Come i melbalonla Dios. Tsi' cha' meleyonla ti Cristo Jesús cha'an mi lac mel chuqui wen. Dios tsi' wan chajrabeyonla la que'tel yom bΛ mi lac mel.

### Ochemonla ti junmojt ti Cristo

<sup>11</sup>Ña'tanla bajche' añetla ti yambΛ ora gentilet\* bΛ la. Jini tsepbilo'\* bΛ i pachalel tsi' bajñel subuyob i bΛ ti ñuc cha'an tsepbil i pachalel ti c'Ab winicob. Tsi' ts'a'leyetla cha'an mach tsepbilic la' pachalel. <sup>12</sup>Ti yambΛ ora ma'anic Cristo la' wic'ot,

mach la' pi'Alobic jini israelob, mach la' cha'anic jini xuc'ul\* ba t'an albil ba i cha'an Dios, ma'anic la' pijtaya. Ma'anic la' Dios wa' ti pañimil. <sup>13</sup>Pero wale añetla ti Cristo Jesús, jatetla ñajt ba añetla ti yamba ora. Tsa' pajyiyetla ti lac'al cha'an ti' ch'ich'el Cristo.

<sup>14</sup>Come Cristo tsi' lajmesabeyonla lac ts'a'leya che' ba tsi' mele ti junmojt jini cha'mojt tejclumob, gentilob yic'ot israelob. Tsi' jeme jubel jini tsalal tsa' ba i t'oxoyonla.

<sup>15</sup>Che' ba tsa' chami, tsi' jisa jini mandar yic'ot tic'oñel tsa' ba i t'oxoyonla. I bajñel tsi' mele jump'ejl tsiji' ba tejclum palybil ba loq'uel ti cha'mojt, cha'an ñach'al mi la cajñel la quic'ot. <sup>16</sup>Ya' ti cruz, Cristo tsi' yuts'esabeyonla lac pusic'al yic'ot Dios. Tsi' mele jini cha'mojt winicob ti junmojt che' ba tsi' jisabeyonla lac ts'a'leya. <sup>17</sup>Tsa' tili i subeñob jini ñajt ba añob yic'ot jini lac'al ba añob cha'an ñach'al mi la cajñel. <sup>18</sup>Come ti pejtelonla tsa' ba lac ñopo Cristo mi lac lac'tesan lac ba ba'an lac Tat ti juntiquil jach ba Espiritu.

<sup>19</sup>Jini cha'an mach chlan yambayix mij q'ueletla. Añix la' wajñib quic'ot lojon. Ochemetixla yic'ot i cha'año' ba Dios. Lac pi'alix lac ba ti Dios. <sup>20</sup>Wa'chocobiletla quic'ot lojon che' bajche' xajlel ti jump'ejl jach ba otot c'acchocobil ti' pam i c'acclib tsa' ba i ts'ajquiyob jini apóstolob yic'ot x'alt'añoob. Jesucristo jiñach Ñuc ba Xajlel ti' xujc otot. <sup>21</sup>Wen xojñibil pejtél jini otot ti Cristo Jesús. Woli ti chañ'an majlel jinto mi' yujtel ti melol jini ch'ujul ba Templo\* i cha'an lac Yum.

<sup>22</sup>Ti lac Yum wa'chocobiletla ja'el ti jump'ejl chumlibal ba' mi' chamtal Dios ti Espiritu.

### Tsa' aq'uenti Pablo i ye'tel ti' tojlel gentilob

**3** Joñon Pablojon, xñujp'elon i cha'an Cristo Jesús cha'añetla gentilet ba la. <sup>2</sup>Mi cal, tsa'ix la' wubi bajche' tsa' aq'uentiyon que'tel cha'an mi cac'ueñetla la' can i yutslél i pusic'al Dios. <sup>3</sup>La' wujil tsa' pasbentiyon i sujmlél mach ba tsictiyemic ti yamba ora, che' bajche' tsac ts'ita' ts'ijbubeyetla. <sup>4</sup>Che' mi la' q'uel jini jun, mi mejlel la' ch'amben isujm jini mucul tac ba tsa' ba i cantesayon Cristo. <sup>5</sup>Mach cambilic i cha'an winicob ti yamba ora, pero wale jini Espiritu tsa'ix i tsictesabeyob jini ch'ujul ba apóstolob yic'ot x'alt'añoob i cha'an. <sup>6</sup>Jiñach i sujmlél cha'an lajal mi caj i yac'uentelob i wenlel gentilob yic'ot israelob, come jump'ejlobix i bac'tal yic'ot Cristo Jesús. Mi caj i tem aq'uentelob ti Cristo chuqui albil i cha'an Dios ti' yutslél i pusic'al.

<sup>7</sup>Che' ba tsi' wa'chocoyon Dios ti' yutslél i pusic'al, tsi' yac'ueyon que'tel ti jini wen t'an. Tsi' tsictesa i p'atlel tic tojlel. <sup>8</sup>Anquese mach ñuconic che' bajche' yaño' ba i cha'año' ba Dios, tsa' aq'uentiyon que'tel cha'an mic subeñob gentilob jini wen t'an yic'ot i yutslél Cristo, cha'an mi' cañoob i ñuclel Cristo mach ba lu' cambilic lac cha'an. <sup>9</sup>Mic tsictesabeñoob pejtelel winicob x'ixicob jini mach ba tsictiyemic c'alal ti' cajibal pañimil che' ba tsi' mele Dios pejtelel chuqui tac an.

<sup>10</sup>Come Dios tsi' wan ña'ta i c'An jini xñopt'añob cha'an mi' yac' ti c'ajñel jini ñuc ba i ña'tabal ti' tojlel yumalob yic'ot ángelob año' ba i ye'tel ti panchan. <sup>11</sup>Che'lach tsi' wan ña'ta i mel Dios che' maxto anic pañimil. Tsa'ix i yac'la ti ts'actiyel ti Cristo Jesús lac Yum. <sup>12</sup>Ti lac Yum ch'ejl lac pusic'al mi mejlel la cochel ti' tojlel Dios cha'an tsa' lac ñopo Cristo. <sup>13</sup>Jini cha'an mic subeñetla ti wocol t'an, mach mi la' wac' ti lujb'an la' pusic'al cha'an ili wocol woli ba j cuch, come an i c'ajñibal cha'an mi la' taj la' wenlel.

**Oración cha'an mi' cambeñob  
i c'uxbiya Cristo**

<sup>14</sup>Jini cha'an mic ñocchocon c ba ti' tojlel lac Tat <sup>15</sup>tsa' ba i yaq'ueyob i c'aba' jujunchajp winicob x'ixicob ti panchan yic'ot ti pañimil. <sup>16</sup>Mij c'ajtiben Dios, i Yum pejtelel chuqui an, cha'an mi' p'atesabeñetla la' pusic'al yic'ot jini Espíritu, <sup>17</sup>cha'an mi' chumtal Cristo ti la' pusic'al cha'an woli la' ñop. Che' jini mi caj i tam'an la' wi' che' tsats c'ayalela ti Cristo, che' c'ux mi la' wubin.

<sup>18</sup>Com mi la' ch'amben isujm yic'ot pejtelel i cha'año' ba Dios bajche' c'amel an i c'uxbiya Jesús, yic'ot bajche' an i jawtilel, yic'ot i ñajtlel, yic'ot i chanlel, yic'ot i tamlel. <sup>19</sup>Com mi la' camben i c'uxbiya Cristo, anquese mach lac lu' canlyic, cha'an mi la' taj pejtelel jini yom ba i yaq'ueñonla Dios.

<sup>20</sup>Wen cabal i p'atalel woli ba ti e'tel ti lac pusic'al cha'an mi' mel ñumen ñuc ba i ye'tel bajche' pejtelel chuqui mi laj c'ajtiben yic'ot pejtelel mu' ba lac ña'tan.

<sup>21</sup>La' tsictiyic i ñuclel Dios ti' tojlel jini mu' ba i tempañob i ba ti Cristo Jesús ti pejtelel ora. Amén.

**Jump'ejlach i bac'tal Cristo**

**4** Joñon xñujp'elon cha'an lac Yum. Ti wocol t'an mic subeñetla cha'an mi la' wajñel che' bajche' yom Dios, come jini cha'an tsi' p'ayayetla. <sup>2</sup>Ajñenla ti pec' ti' yutsllel la' pusic'al. Chan cuchbeñob i sajtemal la' pi'llob ti la' c'uxbiya. <sup>3</sup>Cha'lenla wersa cha'an ñalch'al mi la' wajñel ti jump'ejl jach la' pusic'al ti jini Espíritu. <sup>4</sup>Jump'ejlach i bac'tal Cristo ba' ochemonla. Juntiquil Espíritu. P'aybiletla cha'an mi la' wajñel ti junsujm jach la' pijtaya come jini cha'an tsi' p'ayayetla Dios. <sup>5</sup>Juntiquil lac Yum, junsujm jach woli ba lac ñop, junsujm jach ch'amja'. <sup>6</sup>Juntiquil jach Dios, lac Tat ti lac pejtelel. I yumalch winicob. Mi' cha'len i ye'tel ti' tojlel pejtelel winicob x'ixicob. Mi' yajñel ti la' pusic'al ti la' pejtelel.

<sup>7</sup>Dios tsi' yaq'ueyonla ti jujuntiquilonla i yutsllel i pusic'al che' bajche' lac majtan tsa' ba i t'oxbeyonla Cristo. <sup>8</sup>Jini cha'an tsi' yala ti salmo: "Che' ba tsa' letsi majlel ti panchan Cristo, tsi' p'ayaj majlel cabal tsa' ba c'ajchiyob ti yamba ora. Tsi' yaq'ueyob i majtan tac winicob x'ixicob". <sup>9</sup>Jini tsa' ba letsi majlel ti panchan, cmach ba' ñaxanic tsajni ti yebal lum?

<sup>10</sup>Jini tsa' ba jubi tilel, jiñlach tsa' ba letsi majlel ti' chañelal tac panchan cha'an mi' laj but' pejtel panchan yic'ot pañimil. <sup>11</sup>Tsi' yaq'ueyob i ye'tel winicob: ñaxan

apóstolob, wi'ilix x'alt'añob, yic'ot sub't'añob, yic'ot x'antayajob, yic'ot x'antesajob. <sup>12</sup>Laj wa'chocobilob cha'an mi' cantesañob i cha'año' ba Dios cha'an mi' cha'libeñob i ye'tel, cha'an che' jini mi' p'at'an majlel i bac'tal Cristo, <sup>13</sup>jinto mi lac ñop ti jump'ejl jach lac pusic'al cha'an mi laj can i Yalobil Dios ti pejtelonla, jinto mi lac taj laj coel ti Cristo cha'an mi lac tsictesan i ñucllel che' junlajalonla yic'ot.

<sup>14</sup>Mach yomix alobon to la. Mach yomic mi lac chan ñijcayel cha'an i cantesa winicob che' bajche' i yopol te' mu' ba i ñijcan ic'. Maya jax mi' melob i bajñel sojqemal cha'an mi' lotiñonla. <sup>15</sup>Pero joñonla mi lac sub i sujmllel yic'ot c'uxbiya. Mi lac taj laj coel ti Cristo ti pejtelel chuqui yom. Jiñlach lac jol. <sup>16</sup>Pejtelel i bac'tal Cristo mi' taj i p'at'alel ti' jol. Che' mi' jac'ben i jol pejtel chucbil tac ba ti' bac'tal, tsuyul mi' yajñel yic'ot i p'aquel. Che' uts'at mi' mel i ye'tel, mi' wen coel yic'ot cabal i p'at'alel yic'ot cabal c'uxbiya che' bajche' yom.

#### Tsiji' ba lac pusic'al cha'an Cristo

<sup>17</sup>Jini cha'an mic subeñetla ti lac Yum, mach yomic mi la' chan ajñel che' bajche' yaño' ba gentilob, sojqem ba i ña't'abal. <sup>18</sup>Añoob ti ac'alel yilal. Ma'anic mi' ch'ambeñoob isujm, come ma'añoob i cuxtalal ch'oyol ba ti Dios. Mach i cañayobic come tsatsatax i pusic'al. <sup>19</sup>Tsa' ñam'ayob i pusic'al ti mulil. Tsa'ix i junyajlel ac'ayob i ba ti jontolil. Añoob i wo'lel ti jujunchajp i bibi'lel.

<sup>20</sup>Pero Cristo mach che'ic tsi' cantesayetla. <sup>21</sup>Tsa'ix la' wubibe i t'an ti isujm, come cantesabiletla ti Jesús bajche' yom mi la' wajñel. <sup>22</sup>Yom mi la' c'ay i tsuculel la' pusic'al tsa' ba i lotiyetla che' ba tsa' la' jac'la ti yamba ora, come tuwix yubil cha'an i colosojlel. <sup>23</sup>La' mejlic la' pusic'al ti tsijib yic'ot la' ña't'abal. <sup>24</sup>Yom mi la' ch'am tsiji' ba la' pusic'al melbil ba ti toj ti isujm cha'an ch'ujul mi la' wajñel che' bajche' Dios.

<sup>25</sup>Jini cha'an c'ayala lot. Cha'lenla t'an ti isujm ti jujuntiquiletla yic'ot la' pi'alog, come lac pi'alach lac ba. <sup>26</sup>Mi tsa' tejchi la' mich'ajel, mach la' cha'len mulil. Mach yomic chan mich'etla che' mi' bajlel q'uin. <sup>27</sup>Mach yomic mi la' wis jamben la' pusic'al xiba. <sup>28</sup>Jini tsa' ba i cha'le xujch' mach i chan cha'len. La' i cha'len e'tel. La' i c'an i c'ab cha'an wen ba i ye'tel. Che' jini mi mejlel i yaq'uen i chuba'an jini anto ba yom i cha'an.

<sup>29</sup>Mach yomic mi la' c'an la' wej ti jontol ba t'an. Yom jach mi la' sub chuqui uts'at cha'an mi la' p'atesan jini mu' ba i yubiñoob, cha'an mi la' waq'ueñoob i yutslel i pusic'al. <sup>30</sup>Mach la' waq'uen i ch'ijiyemlel i pusic'al jini Ch'ujul ba Espiritu tsa' ba la' taja ti Dios, come jiñlach la' sellojlel ti jini tal to ba q'uin che' mi caj i tsictiyel majqui i cha'añetla. <sup>31</sup>C'ayala ti junyajlel: ts'a'leya, mich'ajel, a'leya, mich' ba t'an, u'yaj t'an, yic'ot pejtelel jontolil. <sup>32</sup>Yom mi la' coltan la' pi'alog ti' yutslel la' pusic'al. P'untan la' pi'alog. Ñusaben la' ba la' mul che'

bajche' Dios tsi' ñusabeyetla la' mul ti Cristo.

### Ajñenla che' bajche' yom

**5** Tsajcanla i melbal Dios, come c'uxbibil ba i yalobiletla. <sup>2</sup>Ti pejtelel chuqui mi la' mel c'uxbin la' ba che' bajche' tsi' c'uxbiyonla Cristo. Tsi' yac'a i ba ti chamel cha'añonla che' bajche' tsansabil ba i majtan Dios, che' bajche' ofrenda xojocña ba i yujts'il. <sup>3</sup>Mach yomic mi la' taj la' wixic. Mach la' cha'len chuqui bibi'. Mach la' tsajyun chub'añal. Che' leco chuqui mi' yujtel ti la' tojlel, mach yomic mi la' chan al, come mach i t'ojolic ti' tojlel i cha'año' ba Dios. <sup>4</sup>Mach yomic bibi' la' t'an, mi sojqem, mi alas t'an, pero yom mi la' suben Dios wocolix i yala. <sup>5</sup>Come la' wujil ti isujm, ma'anic mi caj i yochel ti' yumantel Cristo yic'ot Dios jini mu' ba i cha'len ts'i'lel mi jini am ba i bibi'lel i pusic'al, mi jini tsaytsayña ba i pusic'al cha'an chub'añal. Come i tsaytsayniyel lac pusic'al cha'an chub'añal lajalach bajche' i c'uxbintel dioste'. <sup>6</sup>Mach yomic mi la' jac' lot yic'ot lolom jach ba t'an, come jini cha'an tal i mich'ajel Dios ti' contra xñusa mandarob. <sup>7</sup>Mach mi la' chan majlel yic'otob.

<sup>8</sup>Ti yamba ora añetla ti ic'ch'ipan ba pañimil. Wale añetla ti' saclel pañimil yic'ot lac Yum. Ajñenla che' bajche' jini año' ba ti' saclel pañimil. <sup>9</sup>Come i yac'bal jini Espíritu jiñach pejtelel chuqui uts'at yic'ot pejtelel chuqui toj yic'ot pejtelel chuqui isujm. <sup>10</sup>Cha'lenla wersa la' mel jini mu' ba i mulan lac Yum. <sup>11</sup>Mach mi la' mel lolom

jach ba che' bajche' jini año' ba ti ic'ch'ipan ba pañimil. Yom mi la' tsictesabeñob i mul. <sup>12</sup>Come quisintic jax ti' yalol chuqui mi' mucul melob. <sup>13</sup>Che' mi lac lu' ac' ti' saclel pañimil, mi caj i tsictesan mi wen o mi jontol. <sup>14</sup>Jini cha'an albilix: "Caña a wut woliyet ba ti wlayel. Ch'ojyen loq'uel ti ic'ch'ipan ba pañimil ba'an chameño' ba. Cristo mi caj i yal'uet ti ajñel ti' saclel pañimil".

<sup>15</sup>Yom yalxal la' wo che' bajche' jini año' ba i pusic'al. Tsajaletla ame mi la' ñusan q'uin che' bajche' jini tontojo' ba. <sup>16</sup>Ti pejtelel q'uin pasal la' ba ti uts'at, come cabal woli' p'ojlel jontolil ti ili ora. <sup>17</sup>Jini cha'an mach la' mel la' ba ti tonto, pero ña'tanla chuqui yom lac Yum. <sup>18</sup>Mach yomic mi la' yac'an ti vino, come jiñach la' wo'lel yujil ba jisaya, pero yom but'uletla ti jini Espíritu. <sup>19</sup>Pejcan la' ba ti salmo tac, yic'ot himno, yic'ot c'ay i cha'an Dios. C'ayin lac Yum ti la' pusic'al, subula i ñuclel. <sup>20</sup>Pejtelel ora subenla Dios lac Tat wocolix i yala ti' c'aba' lac Yum Jesucristo cha'an pejtelel chuqui jach mi' yujtel.

### Jac'ben la' pi'lob ti uts'at

<sup>21</sup>Ti jujuntiquiletla jac'ben la' pi'lob ti uts'at cha'an woli la' bac'ñan Dios. <sup>22</sup>X'ixicob, ac'a la' ba ti utsat ti' wenta la' ñoxi'al che' bajche' mi la' jac'ben lac Yum. <sup>23</sup>Come jini winic i yumach x'ixic che' bajche' Cristo i yumach xñopt'añob. Come jiñobach i bac'tal Cristo jini xñopt'añob mu' ba i tempañob i ba. Cristo jiñach la caj Coltaya. <sup>24</sup>Jini cha'an la' i jac'beñob

i t'an i ñoxi'al x'ixicob ti pejtelel chuqui mi' melob che' bajche' mi' jac'beñob i t'an Cristo xñopt'añob.

<sup>25</sup>Winicob, c'uxbin la' wijñam che' bajche' Cristo tsi' c'uxbi i cha'año' ba. Tsi' yacl'a i ba ti chamel cha'año' <sup>26</sup>cha'an mi' yotsañob ti ch'ujul, cha'an mi' saq'uesaño' ti t'an che' bajche' ti ja'. <sup>27</sup>Cristo mi caj i cantan i cha'año' ba cha'an i t'ojol jax mi' q'uejlelob ya' ti' tojlel che' ma'anic i pajqu'emal tac mi i sojwic'lel tac mi i mul mi yamba i bibi'lel, che' ch'ujulob. <sup>28</sup>Yom mi' c'uxbiño' i yijñam winicob che' bajche' mi' bajñel c'uxbiño' i bac'tal. Jini mu' ba i c'uxbin i yijñam woli' bajñel c'uxbin i ba. <sup>29</sup>Ma'anic winic mu' ba i ts'a'len i bac'tal. Mi' we'esan, mi' cantan ti uts'at che' bajche' Cristo mi' cantan i cha'año' ba. <sup>30</sup>Come i bac'talonla Cristo. Cayalonla ti' tojlel. <sup>31</sup>Jini cha'an mi' cay i tat i ña' winic cha'an mi' yajñel yic'ot i yijñam. Jini cha'tiquil mi' yochelob ti juntiquil jach. <sup>32</sup>Jiñach ñuc ba i sujmllel mach ba tsictiyemic ti yamba ora. Wolic subeñetla ti lajiya cha'an mi la' ña'tan bajche' mi' yajñel Cristo yic'ot xñopt'añob mu' ba i tempañob i ba. <sup>33</sup>Jini cha'an ti jujuntiquiletla yom mi la' c'uxbin la' wijñam che' bajche' mi la' bajñel c'uxbin la' ba. Jini x'ixic la' i q'uel ti ñuc i ñoxi'al.

#### Alalob yic'ot tatalob

**6** Alobob, ch'ujbiben i t'an la' tat la' ña', come che'lach yom lac Yum tsa' ba i yotsayetla ti' wenta. <sup>2-3</sup>Q'uele ti ñuc a tat a ña' cha'an ma' taj a wenlel yic'ot

cabal a jabilel ti pañimil. Dios tsi' yaq'ueyonla ili mandar cha'an mi lac taj chuqui albil i cha'an. <sup>4</sup>Tatalob, mach yomic mi la' techbeñob i mich'ajel la' walobilob. Ju'sabeñob i pusic'al che' woliyob ti coles. Cantesaño' ti lac Yum.

#### X'e'telob yic'ot yumalob

<sup>5</sup>X'e'telob jac'ben la' yum ti pañimil ti baq'uen yic'ot ti' pec'lel la' pusic'al che' bajche' ti' tojlel Cristo. <sup>6</sup>Mach cha'anic jach mi la' q'uejlel ti uts'at ti winicob, pero yic'ot pejtelel la' pusic'al, che' bajche' x'e'telob i cha'an Cristo, cha'lenla che' bajche' yom Dios. <sup>7</sup>Cha'libenla i ye'tel la' yum ti pañimil che' bajche' ti' tojlel lac Yum, mach ti' wutic jach winicob. <sup>8</sup>La' wujil, chuqui jach mi lac mel ti jujuntiquilonla, mi caj lac ch'am lac chobejtabal ch'oyol ba ti lac Yum. Lajal mi' ch'amob jini año' ba ti' yum yic'ot mach ba añobic ti' yum. <sup>9</sup>Yumalob, yom mi la' c'uxbin x'e'telob la' cha'an. Cayal la' bac'tesaño', come ña'tabil la' cha'an an juntiquil Yumal ti panchan, la' Yum, jiñach i Yum ja'el. Dios mach jelchojquic jach mi' c'uxbin winicob.

#### Xojo pejtela mactijib mu' ba i yaq'ueñet Dios

<sup>10</sup>Che' ja'el, quermanojob, p'atesan la' ba ti lac Yum come cabal i p'atalel mu' ba i yaq'ueñetla. <sup>11</sup>Xojola pejtelel la' mactijib mu' ba i yaq'ueñetla Dios cha'an mi la' wajñel ti uts'at ame i lotiñetla xiba. <sup>12</sup>Ma'anic woli laj contrajin winicob año' ba i bac'tal yic'ot i

ch'ich'el. Pero woli laj contrajin xibajob año' ba i ye'tel yic'ot i p'at'alel, woli ba i melob i yum'antel ti ic'ch'ipan ba pañimil, yic'ot jontol ba espíritujob ti pañimil.

<sup>13</sup>Jini cha'an ch'amala pejtelel la' mactajib mu' ba i yal'ueñetla Dios cha'an xuc'ul mi la' wajñel che' mi' tajetla wocol. Che' ba tsa'ix ñumi la' cha'an ti pejtelel, yom chan xuc'uletla. <sup>14</sup>Yom chajpabiletla che' bajche' soldado yic'ot isujmlel i t'an Dios, i wenta la' cajchiñac', cha'an uts'at mi la' cha'len xambal. Lapala toj ba la' pusic'al i wenta la' bujc. <sup>15</sup>Yom chajpabil la' woc cha'an mi la' majlel yic'ot jini wen t'an mu' ba i yuts'esan lac pusic'al yic'ot Dios. <sup>16</sup>Che' ja'el, chucu la' mactajib ti la' c'ab cha'an mi la' yapben i jalajb xiba woli ba ti lejmel i ñi'. Jini lac mactajib chucul ba ti la' c'ab, jiñach i ñopol Dios. <sup>17</sup>C'acala i mactajib la' jol, jiñach la' colantel. Chucula jini espada mu' ba i c'an Espíritu cha'an mi' mel i ye'tel, jiñach i t'an Dios. <sup>18</sup>Cha'lenla oración ti pejtelel ora ti jini Espíritu. Yom mi la' chan c'ajtiben chuqui anto yom la' cha'an. Yom yaxal la'

wo cha'an mi la' chan taj ti oración pejtelel i cha'año' ba Dios.

<sup>19</sup>Cha'lenla oración cha'añoñ ja'el, cha'an mi caq'uentel t'an ba' ora com c sub, cha'an ch'ejl mi cac' ti cajñel jini wen t'an mach ba tsictiyemic ti yamba ora. <sup>20</sup>Come chocbilon tilel cha'an mic sub i t'an Dios. Jini cha'an cac'hlon ti cadena. C'ajtiben Dios cha'an ch'ejl mic sub jini wen t'an che' bajche' yom.

### I yutslel i t'an

<sup>21</sup>La quermano Tíquico, c'uxbibil ba hermano, xuc'ul ba x'e'tel i cha'an lac Yum, mi caj i laj subeñetla cha'an mi la' ña'tan bajche' añoñ yic'ot chuqui wolic mel. <sup>22</sup>Jini cha'an mic choc tilel ba' añetla cha'an mi la' ña'tan bajche' añoñ lojon cha'an mi' ñuq'uesabeñetla la' pusic'al.

<sup>23</sup>La' aq'uenticob la quermanojob i ñach'tilel i pusic'al, yic'ot c'uxbiya, yic'ot i xuc'tilel i pusic'al ch'oyol ba ti Dios lac Tat yic'ot ti lac Yum Jesucristo. <sup>24</sup>La' aq'uenticob i yutslel i pusic'al pejtelelob mu' ba i c'uxbiñoñ lac Yum Jesucristo ti pejtelel ora.